



## De Symboolliest för den Fixtogriep trechtstuken

In Word 2007 un Word 2010 finnst baven links en lierlütt Symboolliest för de Befehlen, de *wirklich* wichtig sünd. Dat is de „Symbolleiste für den Schnellzugriff“, op Platt also de Symboolliest för den Fixtogriep. **Rückgängig** is so en Befehl, de dor henhöört. He is ok al dor. – Man faken wünscht een sik, dat dor noch anner Befehlen weern – welk, op de een sülven gern fix togriepen will. Dat lett sik maken.





- Klickt Se op den lütten Piel  rechterhand an de Fixtogriep-Symboolliest.
- En List klappt op. Wenn dor de Befehl binn steiht, den Se söcht hebbt, bruukt Se em bloots anklicken. **Schnelldruck** t.B. is dor natüürlich!


Nern in de List köönt Se ok anklicken, dat Word de Fixtogriep-Symboolliest **Unter dem Menüband anzeigen** schall. Dat süht denn so ut as in dat Bild nern. Ik finn dat baven beter.

Man wat, wenn dat den Befehl, den Se gern op de Symbolleiste harrn, in de List nich gifft? Keen Problem:

- Klickt Se in de List op den vörletzten Indrag **Weitere Befehle...**



- Dorna seht Se en groten Dialog (Bild neegste Siet). Hier köönt Se Befehle ut alle Registerkoorten vun't Menüband finden un op de Symbolleiste doen. In de grote List links sünd de Befehle, de praat staht, rechts sünd de, de Se al op de Liest hebbt.




Seggt wi mal, Se söcht den Befehl **Speichern unter**. Denn geht Se so to Wark:

- Klickt Se in düssen Dialog de Liste ünner **Befehle auswählen** apen.
- Wählt Se de passlich Registerkoort, hier also „**Datei**“.
- Nu seht Se in de linke List all Befehlen ut düt Menü (Rullbalken bewegen!).
- Rullt Se mit den Rullbalken orrig na nern un klickt Se op **Speichern unter**.





- Dorna klickt Se op den Knoop **Hinzufügen >>**, de twüschen de twee Listen steiht.



- Dorna köönt Se in de rechte List noch de Reegfolg vun de Symbooln fastsetten, as se later op Ehr Liest to sehn ween schallt. Klickt Se dorto een Symbol an un bruukt Se denn de Op-un-dal-Pielen rechterhand vun de List.
- Denn **OK**.



Wenn Se later mal en Symbol nich mehr op de Fixtogriep-Liest hebben wüllt, gaht Se liekso vör; bloots dat Se in den Dialog eerst dat Symbol op de rechte Siet anklickt un denn mit den Knoop  ut de Liest smieten doot.



So köönt Se sik düsse lütte Liest so inrichten, dat Se för dat Mehrste gor nich mehr dat Menüband bruken doot.